



## **Կարգապահական գործ թիվ ԿԳ-19152**

Հայաստանի Հանրապետության փաստաբանների պալատի խորհրդի  
2020 թվականի փետրվարի 4-ի թիվ 40-րդ ԿԳ նիստի

**Ո Ր Ո Շ ՈՒ Մ  
ԹԻՎ ԿԳ/36-Ա**

### **ՓԱՍՏԱԲԱՆ ԱՆԱՀԻՏ ՊԵՏՐՈՍԻ ՀՈՎՀԱՆՆԻՍՅԱՆԻՆ ԿԱՐԳԱՊԱՀԱԿԱՆ ՊԱՏԱՍԽԱՆԱՏՎՈՒԹՅԱՆ ԵՆԹԱՐԿԵԼՈՒ ՀԱՐՅԸ ՔՆՆԱՐԿԵԼՈՒ ՄԱՍԻՆ (ԱՆԴԱՄԱՎՃԱՐԻ ԳՈՐԾՈՎ)**

Հայաստանի Հանրապետության փաստաբանների պալատի (**այսուհետ նաև՝ Պալատ**) խորհուրդը (**այսուհետ՝ նաև խորհուրդ**), նիստը նախագահող՝ Հարություն Հարությունյանի, խորհրդի անդամներ Կարապետ Աղաջանյանի, Մելանյա Առուստամյանի, Սիմոն Բաբայանի, Գայանե Դեմիրջյանի և Կարեն Մեծլումյանի կազմով,

քարտուղարությամբ՝ Մարիամ Պետրոսյանի, քննության առնելով փաստաբան Անահիտ Պետրոսի Հովհաննիսյանին (արտոնագիր՝ թիվ 566) կարգապահական պատասխանատվության ենթարկելու վերաբերյալ հարցը,

### **Պ Ա Ր Զ Ե Ց՝**

#### **1. Կարգապահական վարույթ հարուցելու առիթը և հիմքը.**

Համաձայն ՀՀ փաստաբանների պալատի գլխավոր հաշվապահի կողմից 16.07.2019թ. տրամադրված տեղեկանքի՝ փաստաբան Անահիտ Պետրոսի Հովհաննիսյանն ունի 80.000 (ութսուն հազար) ՀՀ դրամ գումարի չափով՝ 2018 թվականի հունվարից 2019թ. ապրիլ (ներառյալ) ամիսներն ընկած ժամանակահատվածի համար անդամավճարի մուծման չկատարման պարտավորություն:

#### **2. Կարգապահական վարույթ հարուցելու մասին որոշումը.**

01.08.2019թ. ՀՀ փաստաբանների պալատի նախագահի առաջին տեղակալի թիվ 317-Ա/ԿԳ-19152 որոշմամբ կարգապահական վարույթ է հարուցվել փաստաբան Անահիտ Պետրոսի Հովհաննիսյանի կատմամբ՝ «Փաստաբանության մասին» ՀՀ օրենքի (**այսուհետ՝ նաև Օրենք**) 17-րդ հոդվածի 4-րդ մասի, 19-րդ

հողվածի 1-ին մասի 5-րդ կետի և Պալատի ընդհանուր ժողովի կողմից 11.02.2012թ. թիվ 1/4-Լ որոշմամբ հաստատված Փաստաբանի վարքագծի կանոնագրքի (**այսուհետ՝ նաև Կանոնագիրք**) 2.9.1 ենթակետի խախտման հատկանիշներով:

Սույն կարգապահական գործը 08.08.2019թ. հանձնվել է Պալատի խորհրդին:

Խորհրդի նիստերը տեղի են ունեցել 17.12.2019թ., ժամը 19:16-ին և 04.02.2020թ., ժամը՝ 19:20-ին ՀՀ փաստաբանների պալատի վարչական շենքում (ք.Երևան, Զաքյան 7-2, 4-րդ հարկ 12 սենյակ):

### **3. Պատասխանողի համառոտ բացատրությունները.**

30.08.2019թ. Պալատ է մուտքագրվել փաստաբան Անահիտ Պետրոսի Հովհաննիսյանի դիմումը, որով վերջինս հայտնել է, որ 2018 թվականից առողջական խնդիրների պատճառով չի կարողանում զբաղվել մասնագիտական գործունեությամբ և խնդրել է անդամավճարի իր պարտքը զիջել (ներել): Դիմումին կից ներկայացվել են հիվանդության առկայության փաստը հաստատող փաստաթղթեր:

Փաստաբանը թեև պատշաճ ծանուցվել էր կարգապահական նիստի վայրի, օրվա և ժամի մասին, սակայն Խորհրդի նիստին չի ներկայացել:

### **4. Գործի հանգամանքները՝ առկա ապացույցների վկայակոչմամբ.**

Պալատի խորհուրդը, ուսումնասիրելով գործում առկա գրավոր փաստաթղթերը, հաստատված է համարում հետևյալ փաստերը.

- 1) փաստաբան Անահիտ Պետրոսի Հովհաննիսյանը փաստաբանական գործունեության արտոնագիր է ստացել 20.10.2006թ. (հաստատվում է Պալատի ընդհանուր դեպարտամենտի ղեկավարի կողմից տրամադրված տեղեկանքով),
- 2) փաստաբան Անահիտ Պետրոսի Հովհաննիսյանն ունի 80.000 (ութսուն հազար) ՀՀ դրամ գումարի չափով 2018թ. հունվարից 2019թ. ապրիլ (ներառյալ) ամիսներն ընկած ժամանակահատվածի համար անդամավճարի մուծման չկատարման պարտավորություն (հաստատվում է Պալատի գլխավոր հաշվապահի կողմից 16.07.2019թ. տրամադրված տեղեկանքով),
- 3) Պալատի Խորհրդի 19.09.2019թ. թիվ 1/13-Ա որոշմամբ փաստաբան Ռուզաննա Գաբոյանի անդամավճարի պարտքը ամբողջությամբ զիջվել է (ներվել է) (հաստատվում է Պալատի Խորհրդի 14.01.2020թ. թիվ 17/11-Ա որոշմամբ):
- 4) փաստաբան Անահիտ Պետրոսի Հովհաննիսյանի անդամավճարի պարտքը 2018թ. թվականի հունվարից 2019թ. ապրիլ (ներառյալ) ամիսներն ընկած ժամանակահատվածի համար Պալատի կողմից զիջվել է (ներվել է) (հաստատվում է Պալատի գլխավոր հաշվապահի կողմից 04.02.2020թ. Խորհրդին տրամադրված տեղեկանքով):

### **5. Պատասխանողի անձը բնութագրող հանգամանքները.**

Պալատի ընդհանուր դեպարտամենտի ղեկավարի կողմից տրամադրված տեղեկանքի համաձայն՝ Անահիտ Պետրոսի Հովհաննիսյանի (արտոնագիր՝ 566,

ստացված՝ 20.10.2006թ.) նկատմամբ 2017-2020թթ. ընկած ժամանակահատվածում կարգապահական վարույթ չի հարուցվել (չհաշված սույն կարգապահական վարույթը):

## **6. Պալատի խորհրդի պատճառաբանված եզրակացությունը և որոշումը.**

*Հիմք ընդունելով Պալատի խորհրդի կողմից հաստատված փաստերը, դրանք հիմնավորող գործում առկա ապացույցները և քննարկվող իրավահարաբերությունները կարգավորող կանոնները՝ Պալատի խորհուրդը գտնում է, որ փաստաբան Անահիտ Պետրոսի Հովհաննիսյանի նկատմամբ կարգապահական գործի վարույթը ենթակա է կարճման հետևյալ պատճառաբանությամբ.*

Օրենքի 17-րդ հոդվածի համաձայն՝ փաստաբանը փաստաբանների պալատի սահմանած չափով և կարգով մուծում է անդամավճար՝ փաստաբանների պալատի ընդհանուր պահանջների և փաստաբանական գործունեության իրականացման հետ կապված այլ ծախսերի համար: Նույն օրենքի 19-րդ հոդվածի 1-ին մասի 5-րդ կետի համաձայն՝ փաստաբանը պարտավոր է մուծել անդամավճարներ:

Համաձայն Կանոնագրքի 2.9.1. կետի. «Փաստաբանը պարտավոր է սահմանված կարգով և չափով Պալատին վճարել անդամավճար»:

Համաձայն ՀՀ փաստաբանների պալատի խորհրդի 26.12.2013թ.-ին թիվ 33/6-Լ որոշմամբ ընդունված «Անդամավճարների, մուտքի և այլ վճարների վճարումների վերաբերյալ կարգի» **(այսուհետև նաև՝ Կարգ)** 7-րդ կետի՝ փաստաբանները յուրաքանչյուր ամսվա համար անդամավճարների վճարումը կատարում են հաշվետու ամսվան հաջորդող ամսվա մինչև տասնհինգը, իսկ նույն Կարգի 21-րդ կետով սահմանվում է՝ «Ամենամսյա վճար վճարելու պարտականությունը խախտելու համար փաստաբանը կամ օգնականը ենթակա են կարգապահական պատասխանատվության»:

Համաձայն Կարգի 14-րդ կետի «ա» ենթակետի. «Պալատի խորհրդի որոշմամբ փաստաբանին կարող է տրամադրվել հետևյալ արտոնությունը՝ ծանր հիվանդություն ունեցող փաստաբանին՝ անդամավճարի պարտքի զիջում (ներում) և/կամ ամենամսյա անդամավճարից լրիվ մասով ազատում հիվանդության տևողության ժամանակահատվածով՝ դիմում և առողջական վիճակը հավաստող համապատասխան բժշկական փաստաթղթեր ներկայացնելու դեպքում»:

Վերոնշյալ կանոնների վերլուծությունից հետևում է, որ սահմանված ժամկետներում անդամավճար չվճարելու համար փաստաբանը ենթակա է պատասխանատվության, եթե առկա չէ Կարգի 14-րդ կետի «ա» ենթակետով սահմանված հիմքը:

Սույն դեպքում 30.08.2019թ. Պալատ է մուտքագրվել փաստաբան Անահիտ Պետրոսի Հովհաննիսյանի դիմումը, որով վերջինս խնդրել է անդամավճարի իր պարտքը զիջել (ներել), քանի որ առողջական խնդիրների պատճառով 2018 թվականից մինչ օրս չի կարողանում զբաղվել մասնագիտական գործունեությամբ: Դիմումին կից ներկայացվել են հիվանդության առկայության փաստը հաստատող փաստաթղթեր:

Համաձայն ՀՀ փաստաբանների պալատի գլխավոր հաշվապահի 04.02.2020թ.-ի տեղեկանքի՝ փաստաբան Անահիտ Պետրոսի Հովհաննիսյանի անդամավճարի պարտքը 2018թ. թվականի հունվարից 2019թ. ապրիլ (ներառյալ) ամիսներն ընկած ժամանակահատվածի համար Պալատի կողմից գիջվել է (ներվել է)

ՀՀ Փաստաբանների պալատի ընդհանուր դեպարտամենտի ղեկավարի կողմից տրամադրված տեղեկանքից հետևում է, որ փաստաբան Անահիտ Պետրոսի Հովհաննիսյանի նկատմամբ նախկինում կարգապահական վարույթ չիչ հարուցվել՝ բացառությամբ սույն կարգապահականը վարույթի:

Ելնելով վերոշարադրյալից և ղեկավարվելով «Փաստաբանության մասին» ՀՀ օրենքի 10-րդ հոդվածի 5-րդ մասի 14-րդ կետի, 39-րդ հոդվածի 1-ին մասի, 39.7. հոդվածի 5-րդ մասի 2-րդ կետի՝ Պալատի խորհուրդը

### **Ո Ր Ո Շ Ե Ց՝**

**1. Փաստաբան Անահիտ Պետրոսի Հովհաննիսյանի (արտոնագիր՝ թիվ 566) նկատմամբ հարուցված կարգապահական վարույթը կարճել:**

**2. Պալատի աշխատակազմի ղեկավարին հանձնարարել՝ սույն որոշման մասին իրազեկել փաստաբան Անահիտ Պետրոսի Հովհաննիսյանին:**

**Ծանոթություն.** Սույն որոշումը կարող է բողոքարկվել դատական կարգով՝ որոշումը ստանալու օրվանից՝ մեկամսյա ժամկետում: Սույն որոշումն ուժի մեջ է մտնում բողոքարկման համար սահմանված ժամկետն անցնելուց հետո:

ՀՀ փաստաբանների պալատի խորհրդի  
կարգապահական գործով  
նիստը նախագահող՝

Հարություն Հարությունյան

04 փետրվարի 2020թ.  
թիվ ԿԳ/36-Ա  
ք. Երևան